

PRESSITEEDÜS

3. juuni 2013

Võrokeelitsel Umal Pidos oll' 8100 inemist

1. juunil Võrol Kubijal peetü võrokeelitse laulu- ja rahvapido pääkontsõrdist võtt' ütten esinejidega ossa 8100 inemist. Kõrraldustoimkunna edimäidsi kokkovõttidõ perrä läts' kõik väega häste. Nii Contra lipujuuskminõ, tõsõ' inne pito olnu' sündmüse' ku ka pääkontsõrt esi lätsi' kõrda ja pido mõtõ – hoita avvu seen võro kiilt ja võrokõsõs olõmist – tull' häste vällä.

III Uma Pido lavastaja Tarmo Tagamets, päädirigent Silja Otsar ja projektijuht Ursula Zimmermann jäivä' pidoga väega rahulõ. "Kõik läts' laapsahe. Terve' pido juusksõ mõnusahe uman sängün – nigu ütele jõõlõ passis," kõnõlõs Zimmermann, pidäden meelen seo pido keskpunktin olnut Võhandu jõkõ. "Suur rõõm oll' nätä' nii pall'o rahvast Kubija pedäjide all, rahul lauljit ja dirigente, küläliisi kavvõmbalt ja uhkit võrokit. Torõ, et võrokõisi vahtsõnõ lipp sai ilosa pühitsüse. Uma Pido and väke meile hindile, a kimmähe ka Eestimaalõ laembalt," om Zimmermann rõõmsa.

Ursula Zimmermann tennäs' pido kõrdamineki iist häätahtlikku publikut, niisamatõ kõiki tugõjit ja kuuntüpartneriid. "Sääne suur sündmüs om jo ütisprojekt. Armastusõ sünergiäst saa tekütä' suuri asju. Uma Pido om tuust hääs näütes." Kõrraldaja' tundva' rõõmu ka tuust, et kõrraldusligult kõik häste juusksõ. Eräle hää miil om tuust, et üttegi tõsist juhtumist es piä' lahendama ei kiirabi ei politsei. "Ja viil tahas ilmataati tennädä' – lämmä päävä ja tuu iist, et tä eskinä kiholasõ' Kubijalt minemä ajasi," pidä Zimmermann meelen päivä täüs pidopäivä.

Umal Pidos ei olõ innembi nii pall'o inemiisi olnu nii esinejide ku publiku mõttõn. Laulukaarõ all oll 3600 lauljat ja pito kaeman oll' 4500 inemist. Uma Pido sissejuhatus nakas' seokõrd Contra lipujoosuga 26. mail, ku Contra võtt' ette 333 kilomiitre pikkusõ joosu läbi katsa aoluulidsõ Vana Võromaa kihlkunna ja jupikõsõ Setomaa. Võrokõisi pidopäiv nakas' Keriguplatsi laaduga sama päävä hummogu ja päädüsi uhkõ pääkontsõrdiga Võro Kubija laululava pääl. Ödak lõppi simmaniga, kon mængsevä' Untsaka'.

Võrokeelitse laulu- ja rahvapido traditsiooni jakkav III Uma Pido tõi ütitse laulukaarõ ala inemiisi nii Põlva, Võro, Tartu ku Valga maakunnast, a ka muialt Eestist, Lätist ja Soomõst. Tegemist om võro keele ja paigapäälidse kultuuri pidoga, kon peetäs avvu seen võro kultuuri ja võrokõsõs olõmist ja näüdatäs taad ka sõprulõ ja tutvilõ välästuult Võromaad. Uma Pido lõugahus "Ku keskkotus kimmäs, sõs ladva' laulva'" kõnõlõs võrokõsõs olõmisõst ku elojovvun puust – ku juurõ' omma' kimmähe maan ja tukõv tüvi nõsõs korgõhõ, sõs saa ladõv tuulõn vabalt laulda'"

Pido käü küläkõrda Põlva ja Võro vaiht, et näüdadä' Vana Võromaa üts-olõmist. I Uma Pido oll' 2008. a Võrol, II Uma Pido 2010. a Põlvan. Seo pido oll sõs jäl' Võrol Kubijal, 2016. a Uma Pido tulõ vahtsõst Põlvan. Vana Võromaa aoluulidsõn kultuuriruumin omma' 8 kihlkunda: Harglõ, Rõugõ, Karula, Vahtsõliina, Kanepi, Urvastõ, Põlva ja Rāpinä.

Pito kõrrald' MTÜ Võro Selts VKKF kuun Võro Instituudi, Võro Liinavalitsusõ, Võro Vallavalitsusõ, Põlva ja Võro Maavalitsuisiga.

Ettevõtmist tugõsiva' Kultuurkapital (rahvakultuuri sihtkapital, Võro, Tartu ja Põlva maakundõ ekspertgrupi'), Võro Vallavalitsus, Võro liin, Võro Instituut, Rahvakultuuri Keskuse Vana Võromaa kultuuriprogramm, Kohaliku omaalgatuse programm, Võromaa Omavalitsuste Liit, Põlvamaa Omavalitsuste Liit, MTÜ Võrumaa Partnerluskogu LEADER-programmist, MTÜ Piiriveere Liider LEADER-programmist, Loovagentuur Maailm, Võru Empak AS, MTÜ Hinokad, Hiirepadi OÜ, AS Vārška Vesi, Nopri Talumeierei, AS ARKE Lihatõõstus, Taarapõllu talu, Elisa Eesti AS.

Meediapartneri' omma' Uma Leht, Lõuna Leht, Võrumaa Teataja, Maaleht, Eesti Ekspress ja raadio Elmar.

Teedüst saa mano:
www.umapido.ee

<http://umapido.wordpress.com>

Mari-Liisa Parder, kommunikatsioonipäälük
tel 505 2517, e-post mariliisa.p@gmail.com

Ursula Zimmermann, III Uma Pido vidäjä
tel 56 98 98 18, e-post ursula@wi.ee